

# ФАРФОНА ЖАМОАТ САЛОМАТЛИГИ ТИББИЁТ ИНСТИТУТИГА РЕКТОР ТАЙИНЛАНДИ

Республика шошилинч тиббий ёрдам илмий маркази Фарфона филиалида Ўзбекистон Республикаси Президентининг маслаҳатчиси Абдужаббор Абдувоҳидов, вилоят ҳокимлиги ҳамда вилоят соғлиқни сақлаш бошқармаси, олий таълим муассасалари вакиллари иштирокида йиғилиш бўлиб ўтди.

Унда сўз олганлар юртимизда малакали тиббиёт мутахассисларига бўлган эҳтиёж, ушбу йўналишда амалга оширилаётган ислоҳотлар ҳақида тўхтадилар. Хусусан, соғлиқни сақлаш, санитария-эпидемиологик осойишталик ва жамоат саломатлиги соҳасида юқори малакага эга олий маълумотли кадрларни тайёрлаш мақсадида 2020 йил 3 декабрда ташкил этилган Фарфона жамоат саломатлиги тиббиёт институти фаолиятига иштирокчилар эътибори қаратилди. Шунингдек, тадбирда ташкилий масала ҳам кўриб чиқилди.

Акмал Абдиқаҳарович Сидиков Вазирлар Маҳкамасининг тегишли қарорига кўра, Фарфона жамоат саломатлиги тиббиёт институтининг ректори этиб тайинлангани ўқиб эшиттирилди.

Акмал Сидиков 1987 йилда туғилган. У тиббиёт фанлари доктори. Санкт-Петербург давлат педиатрия тиббиёт университетини тамомлаган. Европа дерматология ва венерология академияси (EADV) ва Европа дерматологик тадқиқотлар жамияти (ESDR) аъзоси.

Бундан ташқари, ёш олим 80 дан ортиқ илмий ишлар муаллифи ва ҳаммуаллифи, шу жумладан, дерматология соҳасида 6 та ихтиро, 5 та ўқув-услубий қўлланма, битта федерал клиник тавсиянома, 3 та монография ва 4 та қўлланма муаллифи ҳисобланади.

Акмал Сидиков Тошкент давлат стоматология институти кафедра мудири, Тошкент шаҳар бош дерматовенерологи ҳамда Соғлиқни сақлаш вазирлигининг Фанни ривожлантириш бўлими бошлиғи лавозимларида ишлаган.

Тайинловдан аввал Акмал Сидиков Соғлиқни сақлаш вазирлигининг Дори воситалари ва тиббий буюмлар муомаласини тартибга солиш ва мурувват ёрдамини мувофиқлаштириш бошқармаси бошлиғи лавозимида фаолият юритган.

Йиғилишда сўзга чиқсан Акмал Сидиков ўзига билдирилган ишончдан мамнун эканлигини, институт жамоаси билан биргаликда юқори натижаларга эришиш учун меҳнат қилишини таъкидлади.

Вилоятимиздаги бошқа олий ўқув юртлари ректорлари ҳам ўз ҳамксблари фаолиятига мувафақият тиладилар.

Бизни ижтимоий тармоқларда кузатинг Facebook,  
2021-04-30 14:46:55